

БӨЛІМ: МҰҚАҒАЛИ МАҚАТАЕВ / ӨЛЕҢДЕР

## Көңілім

ЖАРИЯЛАНДЫ 22.01.2023	ТІРЕК СӨЗДЕР Мұқағали Мақатаев	СІЛТЕМЕ <a href="https://bilimger.kz/129786/">https://bilimger.kz/129786/</a>
--------------------------	-----------------------------------	--

## КӨҢІЛІМ

Көңілде дауыл.  
Көңілде оттар жанады.  
Қуаныш-қайғы бірін-бірі жабады.  
Жүрегім сонда жадырап, сергіп қалады,  
Дауыл мен оттан рақат, дамыл табады.  
Достарым көп-ақ.  
Өзімсіп кейде сатады.  
Жұбатып бірі, жылатып бірі жатады.  
Жүрегім сонда неліктен шиыршық атады?!  
Қалайды-ау, сірә, қуаныш, әлде... қапаны...  
Қуаныш, бақыт, өкініш, қайғы — бәрі де ой,  
Көтере берем  
Көңілім — жердің шары ғой.  
О, дарқан көңілім!  
Өмірімнің тозбас сәні ғой!  
Міне, тағы ашу келіп, алқымыма тығылды,  
Ақылымның есігінен аттай бере жығылды.  
Көлдей тұнық көңіліме қоқыс тастап лайлап,  
Кей пенделер қайнатады-ау, қайнатады-ау зығырды.  
Інім айтса бас изедім, ағам айтса қош көрдім,  
Жанның бәрін жатырқамай, жақсы дедім, дос көрдім.  
Араларын ажырату мұншама ауыр болар ма,  
Адалдық пен арамдық деп аталатын қос белдің.  
Мақұл дейін, кінә өзімде, өзіме айып тағайын,  
Ақ жаныма, пәк жаныма қалай күйе жағайыш.  
Адалсың ба, қолынды бер, сенен тәлім алайын,

Арамсың ба, аулақ-аулақ маңайымнан, ағайын.  
Арым, міне, сүттей аппақ алдыма кеп жылап тұр,  
Жаутаңдаған жанарында жалғыз ғана сұрақ тұр.  
Өмірдегі адамдықты, адалдықты теріп ал,  
Қалғандарын құлан жортпас құла дүзге лақтыр!  
Мұқағали Мақатаев

**КМ АА** Куәлік нөмірі: **KZ45VPY00102718** — ҚР Мәдениет және Ақпарат министрлігі

© 2026 **Bilimger.kz** Ақпараттық-танымдық білім порталы. Барлық мазмұн авторлық құқықпен қорғалған.